

**ՀՀ ԿԱ ՊԵՏԱԿԱՆ ԵԿԱՄՈՒՏՆԵՐԻ ԿՈՄԻՏԵ  
ՀԱՐԿԱՅԻՆ ԵՎ ՄԱՔՍԱՅԻՆ ՄԱՐՄԻՆՆԵՐԻ ԲՈՂՈՔԱՐԿՄԱՆ  
ՀԱՆՁՆԱԺՈՂՈՎ**

**ՈՐՈՇՈՒՄ N 42/19**

ք.Երևան

16 հուլիսի 2018թ.

Հայաստանի Հանրապետության կառավարությանն առընթեր պետական եկամուտների կոմիտեի հարկային և մաքսային մարմինների բողոքարկման հանձնաժողովը (այսուհետ նաև՝ Հանձնաժողով), քննության առնելով ՀՀ ԿԱ ՊԵԿ Արարատյան մաքսատուն-վարչության պետի տեղակալի 28.02.2018թ. N31 որոշման դեմ քաղաքացի Լարիսա Խաչատրյանի ներկայացուցչի դիմում-բողոքը՝

**ՊԱՐԶԵՑ**

**1. Բողոքարկման առարկան, դիմում-բողոքով բերված փաստարկները և ներկայացված պահանջները**

Բողոքաբերը գտնում է, որ ՀՀ ԿԱ ՊԵԿ Արարատյան մաքսատուն-վարչության կողմից կատարված ուսումնասիրություններն այդքան էլ չեն համապատասխանում իրականությանը, քանի որ «SUBARU TRAVIQ» 2004թ. արտադրության ավտոմեքենան գնվել է 961 ԱՄՆ դոլարով:

Մաքսատանը անհասկանալի պատճառներով մերժել են՝ մեկնաբանելով, որ իրենք առաջնորդվում են [www.tradecarview.com](http://www.tradecarview.com) կայքում առկա տվյալներով: Սակայն նշված մեքենան ձեռք է բերվել Beforward ընկերությունից: Ներկայացվում է Beforward ընկերության հայաստանյան ներկայացուցչության կողմից տրամադրված գնացուցակը (ինվոյսը): Տվյալ ավտոմեքենայից 18.12.2017թ. մաքսազերծվել է 213121 դրամով:

Ելնելով վերոգրյալից՝ բողոքաբերը խնդրում է վերանայել ՀՀ ԿԱ ՊԵԿ Արարատյան մաքսատուն-վարչության պետի տեղակալի 28.02.2018թ. N31 որոշումը և կատարել հետ գանձում:

**2. Դիմում-բողոքի քննության համար էական նշանակություն ունեցող փաստերը**

ՀՀ ԿԱ ՊԵԿ Արարատյան մաքսատուն-վարչության պետի տեղակալի կողմից 28.02.2018թ. կայացվել է N31 որոշումը (այսուհետ նաև՝ Որոշում), որում նշվել է հետևյալը.

ՀՀ ԿԱ ՊԵԿ Արարատյան մաքսատուն-վարչության պետի տեղակալը ուսումնասիրելով Լարիսա Խաչատրյանի կողմից 17.02.2018թ. թիվ 05100033/170218/0009433 տարանցիկ հայտարարագրով ՀՀ ներմուծված «SUBARU TRAVIQ» (աջ դեկ) մակնիշի 2004թ. արտադրության ավտոմեքենայի համար ներկայացված ավտոմեքենայի մաքսային արժեքը պարզել է, որ Լարիսա Խաչատրյանը 17.02.2018թ. թիվ 05100033/170218/0009433 տարանցիկ հայտարարագրով ՀՀ է ներմուծել «SUBARU TRAVIQ» (աջ դեկ) մակնիշի 2004թ. արտադրության ավտոմեքենա, որի համար ձեռք բերման փաստաթուղթ է ներկայացրել թիվ 1167138 հաշիվ ապրանքագիրը, որում ձեռք բերման արժեքը նշվել է 961 ԱՄՆ դոլար:

Եվրասիական տնտեսական միության մաքսային օրենսգրքի 267-րդ հոդվածի 3-րդ կետի 4-րդ ենթակետի համաձայն այն դեպքում, երբ առկա են հիմնավոր պատճառներ ենթադրելու, որ նույն հոդվածի 1-ին կետում նշված՝ ֆիզիկական անձի կողմից ներկայացված փաստաթղթերը կամ համաշխարհային փոստային միության ակտերով նախատեսված՝ միջազգային փոստային առաքանիներին ուղեկցող փաստաթղթերը պարունակում են ոչ հավաստի տեղեկություններ, եթե ֆիզիկական անձը, նույն հոդվածի 2-րդ կետին համապատասխան, չապացուցի անձնական օգտագործման ապրանքների արժեքի

հաստատման համար ներկայացված փաստաթղթերում պարունակվող տեղեկությունների հավաստիությունը և 5-րդ ենթակետի համաձայն այն դեպքում, երբ առկա է ձեռքբերման երկրում նույնանման ապրանքների այն շուկայական արժեքի հետ անձնական օգտագործման ապրանքների հայտագրված արժեքի անհամապատասխանություն, ըստ որի այդ նույնանման ապրանքները վաճառվում կամ առևտրի սովորական (շուկայական) պայմաններում ներկայացվում են վաճառքի համար, ապա մաքսային մարմնի պաշտոնատար անձը սահմանում է ապրանքների մաքսային արժեքը՝ մաքսային մարմնի տրամադրության տակ գտնվող՝ նույնանման ապրանքների մասին գնային տեղեկությունների հիման վրա, այդ թվում՝ նույնանման ապրանքների մանրածախ վաճառք իրականացնող օտարերկրյա կազմակերպությունների կատալոգներում և կայքերում նշված տվյալների հիման վրա, հաշվի առնելով ֆիզիկական անձի կողմից ներկայացված տեղեկությունները:

Ղեկավարվելով վերոնշյալ իրավական նորմի պահանջով Արարատյան մաքսատուն-վարչության կողմից ուսումնասիրվել են «SUBARU TRAVIQ» (աջ ղեկ) մակնիշի 2004թ. արտադրության ավտոմեքենայի վերաբերյալ [www.tradecarview.com](http://www.tradecarview.com) կայքում առկա գները և մաքսային մարմնի տրամադրության տակ գտնվող գնային տեղեկությունները: Համադրելով Լարիսա Խաչատրյանի կողմից ներկայացված փաստաթղթերը և տեղեկությունները մաքսային մարմինների տեղեկատվական բազայում առկա, ինչպես նաև վերոնշյալ կայքերում առկա տեղեկությունների հետ ակնհայտ է դառնում, որ Լարիսա Խաչատրյանի կողմից ներկայացված ավտոմեքենայի ձեռքբերման գինն էականորեն ցածր է նույնանման ապրանքների համար նախատեսված գներից:

Արդյունքում Լարիսա Խաչատրյանի կողմից ներկայացված փաստաթղթերը, տեղեկությունները և դրանց հիման վրա հայտարարագրված մաքսային արժեքը համարվել է ոչ արժանահավատ և 17.02.2018թ. թիվ 05100033/170218/0009433 տարանցիկ հայտարարագրով ՀՀ ներմուծված «SUBARU TRAVIQ» (աջ ղեկ) մակնիշի 2004թ. արտադրության ավտոմեքենայի մաքսային արժեքը որոշվել է 2000 ԱՄՆ դոլարին համարժեք ՀՀ դրամ:

### **3. Հիմնավորումներ, պատճառաբանություններ և եզրահանգումներ**

Եվրասիական տնտեսական միության մաքսային օրենսգրքի 267-րդ հոդվածի 3-րդ մասի 4-րդ կետի համաձայն՝ Մաքսային մարմինն իր տրամադրության տակ գտնվող՝ նույնանման ապրանքների գնի մասին տեղեկատվության հիման վրա անձնական օգտագործման ապրանքների արժեքը որոշում է հետևյալ դեպքերում՝

4) հիմնավոր պատճառների առկայություն՝ ենթադրելու, որ սույն հոդվածի 1-ին կետում նշված՝ ֆիզիկական անձի կողմից ներկայացված փաստաթղթերը կամ Համաշխարհային փոստային միության ակտերով նախատեսված՝ միջազգային փոստային առաքանիներին ուղեկցող փաստաթղթերը պարունակում են ոչ հավաստի տեղեկություններ, եթե ֆիզիկական անձը, սույն հոդվածի 2-րդ կետին համապատասխան, չապացուցի անձնական օգտագործման ապրանքների արժեքի հաստատման համար ներկայացված փաստաթղթերում պարունակվող տեղեկությունների հավաստիությունը:

Նույն հոդվածի 4-րդ մասի համաձայն՝ որպես անձնական օգտագործման ապրանքների արժեքի մասին տեղեկատվություն՝ մաքսային մարմինը կարող է օգտագործել նաև նույնանման ապրանքների մանրածախ վաճառք իրականացնող օտարերկրյա կազմակերպությունների կատալոգներում և կայքերում նշված տեղեկությունները՝ հաշվի առնելով ֆիզիկական անձի կողմից ներկայացված տեղեկությունները:

Քննարկվող դեպքում ղեկավարվելով վերոնշյալ իրավական նորմերի պահանջներով Արարատյան մաքսատուն-վարչության կողմից ուսումնասիրվել են «SUBARU TRAVIQ» (աջ ղեկ) մակնիշի 2004թ. արտադրության ավտոմեքենայի վերաբերյալ [www.tradecarview.com](http://www.tradecarview.com) կայքում առկա գները և մաքսային մարմնի տրամադրության տակ գտնվող գնային տեղեկությունները համադրելով մաքսային մարմնի տեղեկատվական բազայում, ինչպես նաև վերոնշյալ կայքում առկա տեղեկությունների հետ մաքսատան աշխատակիցները եկել են եզրակացության, որ

Լարիսա Խաչատրյանի կողմից ներկայացված ավտոմեքենայի ձեռքբերման գինն էականորեն ցածր է նույնանման ապրանքների համար նախատեսված գներից: Արդյունքում Լարիսա Խաչատրյանի կողմից ներկայացված փաստաթղթերը, տեղեկությունները և դրանց հիման վրա հայտարարագրվող մաքսային արժեքը համարվել է ոչ արժանահավատ և վերը նշված ավտոմեքենայի մաքսային արժեքը որոշվել է 2000 ԱՄՆ դոլարին համարժեք ՀՀ դրամ:

Հանձնաժողովը ևս գտնում է, որ թիվ 1167138 հաշիվ ապրանքագրում արտացոլված տվյալները, որի համաձայն «SUBARU TRAVIQ» (աջ դեկ) մակնիշի 2004թ. արտադրության ավտոմեքենան ձեռք է բերվել 961 ԱՄՆ դոլարով, ըստ էության, արժանահավատ չեն:

Մասնավորապես, Հանձնաժողովի կողմից ուսումնասիրվել են [www.tradecarview.com](http://www.tradecarview.com) և [www.goo-net-exchange.com](http://www.goo-net-exchange.com) կայքերում (որոնք հանդիսանում են Ճապոնական օգտագործված ավտոմեքենաների առցանց վաճառքի խոշորագույն կայքերից մեկը) «SUBARU TRAVIQ» (աջ դեկ) մակնիշի 2004թ. արտադրության ավտոմեքենաների վաճառքի գների վերաբերյալ տեղեկատվությունը: Արդյունքում պարզվել է, որ նույն մակնիշի և թողարկման տարեթվի ավտոմեքենաների իրացման գները կազմում են 2.300 ԱՄՆ դոլարից մինչև 3.200 ԱՄՆ դոլար, իսկ հայաստանի շուկայում նշված մեքենայի վաճառքի միջին գինը կազմում է 4200 ԱՄՆ դոլար:

Ելնելով վերոգրյալից՝ Հանձնաժողովը գտնում է, որ Որոշմամբ «SUBARU TRAVIQ» (աջ դեկ) մակնիշի 2004թ. արտադրության ավտոմեքենայի համար որոշված մաքսային արժեքն իրատեսական է և առավել ճշգրիտ է արտացոլում նշված ավտոմեքենայի մաքսային արժեքը:

#### 4. Եզրափակիչ մաս

Ելնելով քննարկման արդյունքներից և ղեկավարվելով Հայաստանի Հանրապետության հարկային օրենսգրքի 20-րդ բաժնով, «Մաքսային ծառայության մասին» Հայաստանի Հանրապետության օրենքի 37-րդ հոդվածով, Հանձնաժողովը

#### ՈՐՈՇՈՒՄ Է՝

ՀՀ ԿԱ ՊԵԿ Արարատյան մաքսատուն-վարչության պետի տեղակալի 28.02.2018թ. N31 որոշման դեմ քաղաքացի Լարիսա Խաչատրյանի ներկայացուցչի դիմում-բողոքը մերժել:

Սույն որոշմանը չհամաձայնելու դեպքում այն ուժի մեջ մտնելու օրվանից երկու ամսվա ընթացքում կարող է բողոքարկվել ՀՀ վարչական դատարան:

Հանձնաժողովի նախագահ՝

Ռ.ՄԱՇԱԴՅԱՆ

